



Nunatta Karsiata 2015-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut.

(Aningaasaqarnermut Aatsitassanullu Naalakkersuisoq)

(Siullermeenera)

Ataatsimut isigalugu Demokraatini nuannaarutigilluinnaqqissaarparput Nunatta Karsiata naatsorsuutaanut nassuiaatini takusinnaagatsigu, Namminersorlutik Oqartussani naalakkersuisoqarfiit maligassiuillutik ingasaassinaveersaarsimasut, aningaasartuutit naliginnaasut ingalassimaartissinnaasimagaat sukaterisimasullu, upernaag ukiarlu aningaasanut inasisissap isumaqatigiinniutigineqarnerani isumaqatigiissutaasut naapertoqqissaarlugit.

Paarlattuanik ugguaraarput Sanaartornermut Iluarsaassinermullu Aningaasaateqarfik naatsorsuutigisatsit kinguneqartitsisimangimmat - taamaattumik nuannaarutigaarput immikkoortunut pilersaaruserneq Inatsisartuni amerlanerussuteqarluartut isumaqatigiissuteqarfigisimammassuk kiisalu tamanna Naalakkersuisunit qanimut malinnaavigineqarmat.

Uggornarpoq ingerlatsinerneq sillimmatit ukioq manna atorluarneqarsimammata, 2015-mimi atuisoqanngilat. Eqqarsaatigalugu maannakkut - Inatsisartut tamaviaarnerisigut aamma Naalakkersuisut suleqatiginerisigut - inuttut ajornartorsiutit iluarsaannissaat nakkutigineqarluarmat taamatullu aamma inunnik isumaginninnermi suliat maani nunami sumi tamaaniittut nakkutigineqarluarmata, naatsorsuutigineqarsinnaavoq killilimmik. Tamatuma takutippaa piffissaq ungasinnerusoq isigalugu pilersaaruserneq pisariaqartoq, innuttaasunut ikiortarialinnut pisariaqartinneqartunik aningaasaateqarnissaq pillugu kiisalu aamma peqqissutsikkut inunnillu isumaginnikkut suliniutit ataqatigiissartariaqarput ingerlanneqarlutillu Naalakkersuisut, Inatsisartut kommunillu suleqatiginnerisigut - pitsaaliunissaq siunertarlugu.



Qarasaasianik atuinerup annertusarnissaata piviusunnngortinnissaa suliarinissaalu suli suliaaavoq aamma innersuussutigissavarput suliap tamatumap suli annertunerusumik sulissutiginnissaa piginnaanerit eqqortut atorlugit. Siunissami allaffissornikkut tamatumap aningaasarpassuarnik sipaartitsisinnaanera pissutigalugu. IT-mi isumannaatsuunerup pisortani pitsanngorsarneqarnissaa pisariaqaqimmat oqaatigeqqissavarput.

Demokraatini immikkut DAU-balancip ernumanarnera taassavarput aamma ingerlatseqatigiiffinni, Namminersorlutik Oqartussani kommuninilu taarsigassarsiat erniallit - tamannaannarluunniillu eqqarsaatigalugu kissaatiginarpoq aningaasartuutit amerliartortuartut eqqarsaatigisariaqarpagut kiisalu aningaasaliissutissarpasuit allatut ajornartumik avaqqussinnaanngisagut, eqqarsaatigalugit inunnik isumaginninneq, peqqissutsikkut inuussutissarsiornikkullu ineriartortitsinerit. Akissaqassuserput naapertorlugit ingerlassaagut aamma sillimmatit arlallit piginnisaat pisariaqarpoq, siunissami imatut inissisimaleqqunata allaat isertitatsinnit aningaasartuutit erniat kiisalu ingerlatsineq annertunerulerlutik. Aamma pissanganassaaq ukiuni aggersuni Danmarkip Kalaallit Nunaatalu akornanni akit appasissusaasa qaffasissusaasalu malinnaaviginnisaat, Bloktilskudit inuiaqatigiinnut nalingat eqqarsaatigalugu.

Demokraatini kammattuutigiussavarput kommunini Namminersorlutik Oqartussanilu sukangasuumik aningaasatigut aqutsisoqassasoq, tamanna sinaakkutitut ersarinnerulersitsisarpoq takujuminarsisarluni sumi sutigullu iliuuseqarnissaaq pisariaqassanersoq kiisalu aamma aningaasaatit nakkutigiuminarnersarput taamaattummik immikkut Naalakkersuisut nersuulaarusuppagut kommunit ikiortariallit akisussaassuseqarlutik ikiormatigit.

Kisitsisit kusanartut pissuteqarnerupput akit appariartarnerisa qaffariartarnerisalu iluaqutissarsivigineqarnerusimanerannik kiisalu aamma ingerlatsinermi aningaasartuutit malunnartumik noqinneqarsimanerannik.

Taamaattumik iluaqutaasimavoq suna tamaat qulangerlugit sipaaruteqarneq kiisalu tunuarsimaarnissamut tungaviup ataqqineqarnera peqataanillu sulinermi akileraarutitigut isertitat amerlanerusimapput avammullu tunisassiornermi akit pitsaanerusimallutik.



Naalackersuisut kaammattussavagut ingerlatsinikkut aningaasartuutitigullu sukangasuumik aqutsineq ingerlatiinnaqqullugu annertusaqqeqqullugulu ukiunilu aggersuni sukumiisumik pilersaarudioqqullugu aningaasartuutit suut takkutissanersut. Qulaani immikkoortuni aningaasatigut kinguaattoorfinni kinguaattoornerit misissorneqareerpata, taaava immikkoortunut pilersaarutit, aningaasaliinissanut pilersaarutit il.il. pilersaarusioneqarsinnaangussagaluarpud ajornartorsiutitaqarpiannngitsumillu piviusunngortinneqarlutik innuttaasut ilisimaniassammassuk ukiuni aggersuni amerlasuuni aningaasaqarneq qanoq ingerlassanersoq.

Qilanaarpugut missingersuusionermut naatsorsuusionermullu inatsisip piviusunngortinneqarnissanut aamma nuannaarutigaaarpud Nuna tamakkerlugu pilersaarusionermut nassuiaat allallu aqutsinermi sakkut assigiinngitsut atorneqarmata, suliarineqarmata malinneqarlutillu. Suli naammasseqqajanngilagut Demokraatinili nuannaarutigaaarpud aallareeratta.

Taamatut oqaaseqarluta Nunatta Karsiata 2015-imut naatsorsuutaasa Kukkuinersiuinermut Ataatsimiititaliami suliarineqarnissaat inassutigaaarpud.